

2 JOÃO

João Kata Azagâ Ieto Inweniby

Deus myakâwândy âdy xirâ kata wâgâ tywenizeim awyly iweninribyry nhangahu odaji ieni. Kata wâgâ tâzedy niweniba xirâ iweninribyry, idânârâ enajî olâ João iweninri, mâkâ toenzepa Jesus inwynegyly. Awylygue “João kata azagâ ieto inweniby” kehonly. Deus itaumbrylâ xirâ, iweninribyry olâ egatuim. Deus xirâ kata imeimbyry inwenien-honly myakâwândy Jesus einwânni modoem. Xirâ kata itainrim modoram nhekadyly, tagonro agâ âpynedomoem, Jesus wâgâ iozepa kulâ tonomedâni neinwâmpyra itomoem warâ.

Aguely adaguho

¹Âyam xirâ kata kâinwenily, âmâ pekodo Deus induakeyby, âmeombyryam warâ^a. Jesus einwânni modo iwymâry urâ. Toenzepa âwyne-dylymo. Urâ kulelâba olâ âwynenimo; idânârâ Kunwym Deus itaumbryry iozeno einwânni modo âwynedâmo lâpylâ. ²Deus itaumbryry iozeno xina nheinwânto ara mâinwândyly-mogue xina âwynedylymo. Deus nhutuen-hoymby aunlolâ kyangahu oday awyly, itaumbryry iweniby ara lelâ aguidyly warâ.

³Kunwym Deusram, imery Jesus Cristoram warâ kâenkadyly, kytyendomoem, koendâ kâentomoem, kydadahuliba kyetomoem warâ. “Xina agâlâ itaungâ, amyguehomo-byry xina nheinwântay, tagonrodo agâ xina âpyneday warâ” uguely inanry eyanmo.

Agonromo agâ âpynedaungâ

⁴Âmeom egary xidadâ. Toenzepa kohomaendâ, Deus itaumbryry iozeno lelâ anhekylymo kely kâindatuo, Kunwym Deus aguitoem aguehobyry ara aidylymo awylygue. ⁵Aituo, kou Cristo eynynonro, wauguely âyam, kurâ Jesus einwânni modo kagonro agâ kydâpynene, uguely. Iwelo mâkeba xirâ kuruto. Jesus Cristo einwândyly kianguly umelâ, xirâ kiuntuly. ⁶Deus aguehobyry ara lelâ aguidyly-ro watay, Deus tywyneze kydawyly tânehonze kurâ. Augueondyly, Jesus mâinwândylymo magulymo umelâ, agonromo agâ âpyneniem mawylymo mâuntulymo.

⁷Tâinkâ lelâba iozepa kulâ enomedâze kewâni modope awyly. “Kurâ ara inkâba Jesus Cristo iazely. Tâzegado-pyry uguondoem ityby kulâ” kelymo. Arâ aguehomoem aguehoymbyem akaemo Cristo Idueryam. Xypyry

^a 1.1 Ise, imeombyry warâ lelâlâ tâdaenkuzeim, tâlâ pylâ olâ awâkâ “Jesus âjigie einwânni âtâdyguynri modoram inwenily” kerim modo.

etay ise mâkâ uguondo Cristo Iduery âepanâguelly. Toenzepa ise mâkâ tâdâsenogudyly kely. ⁸Tonomeguelâ itaungâ, akaemoram mâzenokuoba mitomoem. Mâzenokuoba âmaemo-ro watay, Deus ipywazemo, xurâem amitomobyry wâgâ, tynynonro modoram koendonro tiunduly ume.

⁹Tâlâ lâpylâ Cristo nhenomedâdogueba kulâ enomedâni modo, tyangahu odano tunârygue kulâ nhenomedâdylimo. Jesus Cristo takaze kehoem tonomegue wâne âdutulyimo, Deus agâbamo olâ. Cristo wâgâ aguewâni modo olâ, Kunwym Deus, imery Jesus Cristo warâ agâba tyesebamo. ¹⁰Itymo anaxi Cristo nhenomedâdobyry araba kulâ unâ

egatuwâni modo saindyly-ro watay, ataen-homo ara kâzekaunâdaundâ, “Âetaungâ ietyram; ikobyzeguewâ-daungârâ, yagâ âwinduataungârâ” tâkezeba itaungâ eyanmo. ¹¹Akamo mâenkaunâdylimo-ro watay, inakanhe aitomo amânhedylimolâ lâpylâ mawânrà.

Aguely âdypygueândo

¹²Toenzepa âyanmo kêengatudyze watobe urâ, xirâ kata wâgâba olâ kêengatudyze wawyly. Udâdyse urâ âyanmo, urâ lelâlâ âyanmo auguehoem, on-hoam lelâ kuomaroem.

¹³Âwidy Deus induakeyby imeombyry idaenkulyimo lâpylâ^b.

Xirâ kulâ âyanmo augueho.

^b 1.13 “Xirâ kata iweninribyry ijidadâry donro Jesus einwânni modo agueho” kerim modope lâpylâ “âwidy Deus induakeyby imeombyry” keduo.